

## Era sch'i fa mal a Winterthur – la brigada 11 vegn a Cuira

■ (anr/vi) **Cusseglie federal Ueli Maurer conferma il staziunament da la brigada mecanisada a Cuira – era sche la sperdita fa mal a Winterthur. Il nov concept da staziunament è vegnì tematisà ier en la chombra pitschna en connex cun in'interpellaziun da Martin Schmid.**

«In chantun da muntogna n'è a prima vista betg gist adattà per ina brigada mecanisada», ha concedì Maurer. Cun la piazza da tir a Valragn sa chattia dentant il pli impurtant lieu da scolaziun per questas truppas en il Grischun. Uschia saja quai era giustifitgà da staziunar la brigada mecanisada en il chantun da muntogna. Da l'otra vart ha il schef dal departament militar era mussà ina tscherta chapientscha per Winterthur. Dapi l'entschatta dal stadi federal saja Winterthur stà ina citad cun ina garnischun. En l'avegnir vegnia ella ad esser senza in commando. «Ins vesa pia ch'era pitschens spustaments pon far mal.»

Fitg cuntent da questa resposta è cusseglier dals chantuns *Martin Schmid* (pld/GR). Il nov concept da staziunament ch'ins haja preschentà l'emna pasada a Berna giaja gea pir en consultaziun ed i saja da quintar anc cun tschertas midadas. Perquai saja el fitg satisfatg che Maurer haja uss affirmà ch'il cussegl federal veglia segir spustar la brigada mecanisada a Cuira.

Sia interpellaziun – cun la finamira ch'il Grischun vegnia resguardà commensuradamain tar il concept da staziunament – aveva Schmid gia inoltrà il settember passà. La populaziun a Cuira na chapeschia betg sch'ins stoppia prender en cumpra chanera d'exercizis da tir senza posseder in commando, aveva argumentà Schmid en l'interpellaziun: «Cun il staziunament d'in commando a Cuira tegnan ins era quint a la minoritad linguistica dals Rumantschs.»